



ज्वलपा वाःपौ

JWOJALAPA NEPALBHASA WEEKLY


दै: ६ ल्या: ३२ पूर्णाङ्क: ८४

ने. सं. ११३६ सिल्लाग पंचमी आइतवा: २०७२ फागुण १६ गते आइतवार (Feb- 28, 2016)

मू: ८/- (च्यातका)

ध्यबा इनेगु ज्या दिकेत ओली सरकारया निर्देशन

सरकारया स्वीकृतिविना छें दने मदइगु



ज्वलपा वाःपौ

तःभुखाय् ब्वःगु दच्छि पूवनेत स्वला जक ल्यंदनिगु अवस्थाय् भुखाचं छें दुनावीपं व च्वने मजिया टहराय् च्वना च्वनेमाःपिं मन्तयूसं थःथःगु हे कथं छें दनेगु सुरु यानाहःगु दु । सरकारपाखें माःगु कथंया ग्वहालि याइगु आशा यानाच्वंसां नं माःगुलिं थःथःगु ध्यवां दुसां मदुसां छें दनेगु ज्या सुरु यानाहःगु दु ।

ता ई तक नं माःगु कथं सरकारपाखें ध्यवा ग्वहालि वइ धकाः आशा यायां हे मवःगु अवस्थाय् थःपिनिगु क्षमता कथं हे छें पिइगु नाप नापं थःथःगु हे कथं दनेगु ज्या भुखाचं पीडितपिन्सं सुरु याना

हःगु खः । थ्व हे दथुइ केपी शर्मा ओलीया नेतृत्वया वर्तमान सरकारं तत्कालया नितिं भुखाचंप्रभावितयात न्हापा हे स्वीकृति मकासे छें दनेगु ज्या दिक्गु दु । राष्ट्रिय पुननिर्माण प्राधिकरणपाखें छगू सूचं हे जारीयाना व्यक्तिगत छें दनेगु ज्या तक पना बिउगु दु । प्राधिकरणं व्यक्तिगत छें पुनः निर्माण यायेत सरकारी अनुदान बिइगु छें मदयेकेत भुखाचं प्रभावितपिन्त इनाप तक याःगु दु । आः दयेकीगु छें सुरक्षित नापं भुखाय् प्रतिरोध जुइमाःगु सरकारया प्राविधिक ग्वहालि व समन्वयपाखें जक निर्माण यायेत सरकारं प्रतिबन्ध तया बिउगु दु ।

थ्व हे दथुइ पुननिर्माण प्राधिकरणपाखें थीथी संघ संस्थापाखें न्त्यलाथे ध्यवा इनेगु ज्या यायेमते धकाः धाःगु दु । सूचनाय् स्वीकृति विना छें दयेकेगु व ध्यवा बिइगु ज्या धइगु गैर कानुनी जुइ धकाः न्त्यथसैं अथे पनेगु ज्या याःगु खः । सूचनाय् धयातःगु दु 'पुननिर्माण व पुनस्थापनाया ज्याय् गैरसरकारी संस्थाया ग्वहालि परिचालन यायेगु सम्बन्धी ब्यागलं कथंया कार्यविधि नं प्राधिकरणं तयार यानाच्वंगु दु । प्राधिकरणया पूर्व स्वीकृति विना व्यक्तिगत छें दनेगु व ध्यवा इनेगु ज्या प्रचलित कानुन व नीतिया अखः जुइगु जूगुलिं उकियात दिका प्राधिकरणया स्वापुतिइ वनेत आग्रह याःगु दु ।'

थःपिं च्वनेगु छें भवन निर्माणय् प्राधिकरणलिसे समन्वय मयासे दयेकीगु अवस्थाय् निर्माण गुणस्तर मजुइगु ठहर याना प्राधिकरणं अज्वःगु निर्देशन जारी याःगु खः । छें दनेगु सन्दर्भयात कया पिथंगु सूचनाय् धयातःगु दु 'जिमिसं गैर सरकारी संस्थाया संलग्नतायात व्यवस्थित याये त्यनागु खः । न्त्याबलेंया नितिं दिकेगु प्राधिकरणया मनसाय मखु ।'

थुगु कथं प्राधिकरणपाखें स्वीकृति मकासे छें मदनेत सुचं जारी याःगु अवस्थाय् थौकन्हय् छें दनेगु ज्या यानाच्वंसां भुखाचं पीडितपिन्त तसकं ज्यामछिगु अवस्था वःगु दु । आः छें दनेगु ज्यायात मदिकल धाःसा कन्हय् सरकारपाखें वइगु आर्थिक सहयोग काये मखनीगु नापं कानुनी रुपं नं भन्फत वइगु जकं मखुला धकाः न्हयसः तयाहःगु दु ।

नेवाः पत्रकार दबूया यें, यल, काभ्रे जिल्लाया तःमुँज्या क्वःछित

नेवाः पत्रकारतय्गु राष्ट्रिय संगठन नेवाः पत्रकार राष्ट्रिय दबूया निक्कःगु केन्द्रीय तःमुँज्या वइगु बैशाख ११ गते लोकतन्त्र दिवस खुन्हु किपुलिइ यायेगु नितिं थीथी जिल्लाया अधिवेशन यायेगु तयारी याःगु दु ।

थ्व हे भूवल्य नेवाः पत्रकार राष्ट्रिय दबूया केन्द्रीय नायः श्रीकृष्ण महर्जनया उपस्थितिइ जूगु यें जिल्ला समितिया मुँज्यां यें जिल्लाया निक्कःगु तःमुँज्या वइगु फागुन २८ गते शुक्रवाः यायेगु निर्णय याःगु दु ।

उकिया नितिं यें जिल्लाया नायः नातिकाजि महर्जनया नेतृत्वय् अधिवेशन मू ग्वसाःखलः नीस्वंगु दु । अथे हे जः इनेगु नितिं प्रजित महर्जनया नेतृत्वय् कवः नीस्वंगु दुसा रत्नकाजि लुनिभाःया नेतृत्वय् नेवाः जः विशेष ल्या पिथनेगु नाप नापं ज्याभ्वः व्यवस्थापन कवःया कजि, सानुकाजी महर्जनया नेतृत्वय् आर्थिक कवः व विगेन तुलाधरया नेतृत्वय् प्रचारप्रसार कवः नीस्वंगु दु ।

अथे हे नेवाः पत्रकार राष्ट्रिय दबू काभ्रे जिल्लाया अधिवेशन वइगु फागुन २६ गते बुधवाः याइगु जूगु दु । उकिया नितिं माःगु कथंया तयारी जुयाच्वंगु दु धकाः दबूया काभ्रे जिल्लाया नायः रमा कार्जितं धयादीगु दु । अथे ह थीथी जिल्लाय् नं अधिवेशन यायेगु जुयाच्वंगु दु धकाः दबुलिं जानकारी बिउगु दु ।



यलय् न्हापांखुसि धर्मादित्य पत्रकारीता सिरपाः लःल्हाइगु

नेवाः पत्रकारतय्गु राष्ट्रिय संगठन नेवाः पत्रकार राष्ट्रिय दबूया यल जिल्लाया निक्कःगु तःमुँज्या वइगु फागुन २२ गते शनिवाः याइगु जूगु दु ।

तःमुँज्याया नितिं नेवाः पत्रकारतय् जः दयेकेगु ज्या जुयाच्वंगु दु । उगु अधिवेशनया नितिं माःगु कथंया तयारी जुयाच्वंगु दु धकाः दबूया यल जिल्लाया नायः सुरज व्यञ्जनकारं जानकारी बियादीगु दु । थ्व हे दथुइ निक्कःगु तःमुँज्याया भूवल्य न्हापांखुसि धर्मादित्य धर्माचार्य पत्रकारीता सिरपाः लःल्हायेगु जुइ धाःगु दु ।

थ्व हे दथुइ याकनं हे खप जिल्ला, भुपा, सुनसरी, इलाम, दोलखा, गोरखा, नुवाकोट, सुर्खेत, मकवानपुर, नुवाकोटनिसं थीथी जिल्लाय् नं नेवाः पत्रकार राष्ट्रिय दबूया जिल्ला अधिवेशन यायेगु तयारी जुयाच्वंगु दु धकाः धाःगु दु ।

जिल्लानिसं केन्द्रीय अधिवेशन तकया नितिं नं सकलसिनं थःथःगु थासं ग्वहालि यानादीत नेवाः पत्रकार राष्ट्रिय दबूपाखें देयन्यंकया नेवाः पत्रकारतय् इनाप याःगु दु



ज्वजलपा वाश्यो

सल्लाहकार
श्रीकृष्ण महर्जन
प्रकाशक:

नजरराम महर्जन
सम्पादक

श्रीकृष्ण तण्डुकार
ले-आउट:

ज्वजलपा डेस्कटप
संवाददाता

भरत महर्जन, निरजमान सिंह
थाकू

प्रिन्ट स्काई, यें

ज्याकू: निखासी त्वा: किपू नपा-३

फोन ल्या: ४३३३००७, ९८४१४०१०७७

ई-मेल : kirtipursandesh@live.com

सम्पादकिय

मधेसी मोर्चाया आन्दोलन व वार्ता

आन्दोलन याना वयाचवंगु संयुक्त लोकतान्त्रिक मधेसी मोर्चालिसे वार्तापाखें समस्या समाधान जुइगु अवस्थाय् थ्यन धका: तक्व: मछि हे समाचार मव:गु मखु । लगातार रुपं वार्ता जुइगु अले समस्या समाधान जुइन धका: मनूतय्सं थुइकीगु तर वास्तवय् वार्तापाखें ला समस्या समाधान हे मज्जनीगु ख: । सामान्यतया वार्ताया नितिं राज्यपक्ष अर्थात सरकार पक्ष गम्भीर जुइमा:गु ख: तर सरकारपक्ष हे गम्भीर मज्जनीगु आन्दोलनरत पक्षं द्वपं बियाचवंगु अवस्था दु ।

थ:पिनिगु मागयात ओली सरकारं सम्बोधन मया:गु खँ न्हयथसें थ:पिनिगु मागया वेवस्तायात धा:सा न्हापा थें हे आन्दोलन यायेगु ख्याचव: बियाह:गु दु । वार्ताया माध्यमं समस्या समाधान जुइमा धका: आन्दोलनया स्वरुप हिलागु तर थ:पिनिगु मागयात वेवास्ता याना वंगु अवस्था अले वार्ता तत्काल मयात धा:सा थ:पिं न्हापाया स्वरुप कथंया हे आन्दोलन यायेत बाध्य जुइ धका: ख्याचव: तर्क बियाह:गु दु ।

वास्तवय् आन्दोलनरत पक्षपाखें बिउगु द्वपं पाय्छि ख:सा व धइगु ओली सरकार वार्ताया माध्यमपाखें समस्या समाधान यायेगु पक्षय् मदुगु अले बल प्रयोग याना जूसां आन्दोलनयात कमजोर यायेगु नियत कथं वनाचवंगु पुष्टि जुइ । उकिं सरकार धाइम्ह दक्ले अप्ठ: गम्भीर जुया वनेमा:गु अले वार्ताया माध्यमं समस्या समाधान यायेगुपाखे स्वयेमा: । थुगु खँय् ओली सरकारं इलय् हे विचा: यायेमा:गु आवश्यकता दु ।

साहित्य/चिनाखं

हाईकू शौरभ शाक्यया

शौरभ शाक्य

ख्वप

७.यातालु निभा:
म्ह:छम्हं चिकनं थी
नाइगागु कसि ।
८.सुखू गंगु प्वा:
लोमां त्ययेकि मुस्यां
पतूचाय् ल:जा ।
९. पौभा दुनेसं
भयाजं जुयावं शान्ति
सम्पदा वार्ता ।

१०. उफ् ल्हा:मन्थ्यात
गथे दायेगु निभा:
चकख्य:या जा ।
११.थुलि कँ हाल
जि दुनेया सौरभ
छंत छु कने ।
१२.बेथांवंगु लँ
म्वैय् म्वैय् चाका यक्व जु
पला: धे धे चु ।

अन्तर्राष्ट्रिय श्रम संगठन महासन्धी १६९ छु धयात:गु दु

(अन्तर्राष्ट्रिय श्रम संगठनं सन् १९८९ स आदिवासी जनजाति सम्बन्धी महासन्धी दयेका: उकिंयात आईएलओ महासन्धी-१६९ या रुपय् लागु या:गु ख: । थुकिंयात नेपाल सरकारं नं अनुमोदन याये धुंकूगु दुसा थ्व थौकन्हय् नेपालय् कानून सरह हे लागु जुइधुंकूगु दु । थुकिंया सम्बन्धय् जनचेतना बलकें मा:गु तातुना: थीथी संघसंस्था थ:गु स्तरय् थीथी कथंया ज्याभव:त न्ह्याकावयाचवंगु दु ।

अन्तर्राष्ट्रिय श्रम संगठनया महासम्मेलनं, अन्तर्राष्ट्रिय श्रम कार्यालयया संचालक निकायं जेनेभामा स:तूगु व ७ जुन १९८९ स थुकिं थ:गु ७६ क्व:गु अधिवेशन सम्पन्न या:गु,

आदिवासी व जनजाति सम्बन्धी महासन्धि व सिफारिश, १९५७ स समाविष्ट अन्तर्राष्ट्रिय मापदण्डतय् न्हयब्वसें, मानव अधिकारया विश्वव्यापी घोषणापत्र, आर्थिक, सामाजिक तथा सांस्कृतिक अधिकार सम्बन्धी अन्तर्राष्ट्रिय प्रतिज्ञापत्र, नागरिक व राजनीतिक अधिकार सम्बन्धी अन्तर्राष्ट्रिय प्रतिज्ञापत्र व भेदभाव निवारण सम्बन्धी यक्व अन्तर्राष्ट्रिय लिखतया व्यवस्थातय् लुमंकुसें,

सन् १९५७ निसें अन्तर्राष्ट्रिय कानूनया क्षेत्रय् जूगु विकासतलिसें विश्वया दक्क क्षेत्रय् आदिवासी तथा जनजातिया अवस्थाया सम्बन्धय् जूगु विकास थ्व विषयस न्हापाया मापदण्डतय्गु समिकरणमूलक अभिमूखिकरण चीकेगु उद्देश्यं न्हगु अन्तर्राष्ट्रिय मापदण्डत स्वीकार यायेगु उपयुक्त जूगु खँयात विचा: यासें,

थ:गु बसोबास दुगु राज्यतय्गु संरचनादुने थ:गु संस्थात, जीवन पद्धति लिसें आर्थिक विकासय् नियन्त्रण याये दइगु, थ:गु म्हासिका, भाय् व धर्मत कायम यायेगु व विकास यायेगु थुपिं जातितय्गु आकांक्षायात मान्यता विसें, विश्वया यक्व

ब्वय् थुगु जातितय् थ:गु बसोबास दुगु राज्य दुने मेपिं जनतात सरह थ:गु मौलिक मानव अधिकारत उपभोग यायेत असमर्थ जूपिं व उमिगु कानून, मूल्य, परम्परा व दृष्टिकोणत प्राय: तनावनाचवंगु खँयात न्हयब्वसें,

सांस्कृतिक विविधताय् लिसें मानव जातिया सामाजिक व पर्यावरणीय सामन्जस्यता लिसें अन्तर्राष्ट्रिय सहयोग व समझदारीइ आदिवासी तथा जनजातिं ब्यूगु विशिष्ट योगदानपाखें ध्यानाकर्षण यासें,

संयुक्त राष्ट्र संघ, संयुक्त राष्ट्र संघीय खाद्य तथा कृषि संगठन, संयुक्त राष्ट्र संघीय शैक्षिक, वैज्ञानिक तथा सांस्कृतिक संगठन व विश्व स्वास्थ्य संगठन एवं अन्तर अमेरिकी इण्डियन इन्सिच्यूटं उपयुक्त तह व सम्बन्धित क्षेत्रय् प्राप्त या:गु ग्वाहालिइ क्वय्या व्यवस्थात तर्जुमा या:गु व थ्व व्यवस्थातय्गु प्रयोग प्रवर्द्धन व सुनिश्चित यायेत थुज्व:गु ग्वाहालि जारी यानातयेत प्रस्ताव या:गु खँयात न्हयब्वसें,

थुगु अधिवेशनया प्यक्व:गु कार्यसूचीया रुपय् दुगु आदिवासी तथा जनजाति सम्बन्धी महासन्धि, १९५७ (ल्या: १०७) या आंशिक संशोधन सम्बन्धी छुं प्रस्तावत ग्रहण यायेगु निर्णय यासें, लिसें थुपिं प्रस्तावतय्सं आदिवासी तथा जनजाती सम्बन्धी महासन्धि, १९५७ लाई संशोधन याना: छगू अन्तर्राष्ट्रिय महासन्धिया रुप काइगु खँया निर्णय यासें,

थौं १९८९ सालया जुन महिनाया २७ तारिखया न्हि आदिवासी तथा जनजाति सम्बन्धी महासन्धि, १९८९ धैगु क्वय् च्यात:गु महासन्धियात पारित यानागु दु ।

भाग १ सामान्य नीति- धारा १, १. थ्व महासन्धि क्वय्या जनजाति तथा जनतातय्गु हकय् लागू जुइ, (क) सामाजिक, सांस्कृतिक व आर्थिक

अवस्थातय्सं राष्ट्रिय समुदायया मेमेगु पुचलं बिसकं लापिं सुया अवस्था थ:गु परम्परा वा प्रथा वा विशेष कानून वा नियमतय्गु कारणं पूर्ण वा आंशिक रुपं नियमित जुइगु हैसियत दुगु स्वतन्त्र मुलुकया जनजाति, (ख) त्याकूगु वा औपनिवेशीकरणया वर्तमान राज्य सिमानाया स्थापना जूगु इलय् गुगुं देय् वा उगु देय्या छुं भौगोलिक क्षेत्रय् च्वनाच्वपिं बासिन्दातय्गु वंश जूगु कारणं आदिवासी धायेकीगु व थ:गु कानूनी हैसियत न्ह्याथेजा:गु जूसां थ:गु छुं वा फुक्कं सामाजिक, आर्थिक, सांस्कृतिक व राजनीतिक संस्थात कायम यानात:गु स्वतन्त्र मुलुकया जनतात । २. आदिवासी वा जनजातिया रुपय् स्वपहिचान थ्व महासन्धिया व्यवस्थात लागू जुइगु समूहतय्गु निर्धारण यायेगु नितिं छगू मौलिक मापदण्ड मानय् याइ । ३. थुगु महासन्धिइ प्रयुक्त जनता खँय:यात अन्तर्राष्ट्रिय कानून अन्तर्गत उगु खँग्वलं म्हासीकेफुगु अधिकारतय्गु सम्बन्धय् छुं नं लिचव: लाकीगु व्याख्या याइमखु ।

धारा २, १. सम्बन्धित जनताया सहभागिताय् उज्व:गु जनताया अधिकार संरक्षण यायेत व उमिगु अखण्डताया सम्मानयात प्रत्याभूति यायेत समन्वित व प्रणालीबद्ध ज्याया विकास यायेगु जिम्मेवारी सरकारया जुइ ।

२. थुज्व:गु ज्याय क्वय्या उपायत तर्क समावेश जुइ (क) राष्ट्रिय कानून व नियमतय्सं देय्या जनसंख्याया मेगु दुज:पिन्त ब्यूगु अधिकारलिसें अवसरतपाखें थुपिं जनताया दुज:पिसं समान रुपय् फाइदा का:गु सुनिश्चित यायेगु, (ख) थ्व जनताया सामाजिक तथा सांस्कृतिक पहिचान, परम्परा तथा प्रथा व संस्थातप्रतिया सम्मान यासें उमिगु सामाजिक, आर्थिक तथा सांस्कृतिक अधिकारतय्गु पूर्णकार्यान्वयनया प्रवर्द्धन यायेगु,

ज्वजलपा वा:पौ ब्वनामिया धापू

ज्वजलपाया हरेक अंक विशेषांक

हनेबह:म्ह सम्पादकजु,

त:दँ लिपा किपूलीं पिदंगु नेपालभाषाया छगूयां छगू जक वा:पौ ज्वजलपा वा:पौ ब्वनेदया: तसकं लसता बल ।

खय्तला किपूलीं नं खय्भाय्या प्यंगु वा:पौ पिदनाचवंगु दु । प्यंगु वा:पौया थ:थ:गु हे विशेषता दु । नेवा:तय्गु बाहुल्यता दुगु किपूली नेपालभाषाया छगू हे वा:पौ मदुधका: कीर्तिपुर सन्देशया पिकाक:मि नजरराम महर्जनयात नेपालभाषां नं छगू वा:पौ पिकायेत इनाप यानाकथं वय्कलं ज्वजलपा वा:पौ पिकया दिल । दकलय् न्हापां वय्क:यात यक्व यक्व सुभाय् बियाचवना । मदिकक पत्रिका पिकया वनेफय्मा धका: नं भिन्तुना च्वना ।

ज्वजलपा वा:पौया ग्राहकजुया मदिकक पत्रिका ब्वने खना:च्वन । थुगु पत्रिकाया समाचार व लेखया थ:गु हे विशेषता दु । थुकी नेवा: सम्बन्धि समाचारत यक्व हे दु । अथे हे भीगु तजिलजि व नेवा:तय्गु भाषिक सांस्कृतिक सम्बन्धि यक्व हे लेखत ब्वने दत । फुक्कं लेखत च्वछाय् बह:जु । उकीसनं नेवा:भ्वय्या महिमा, सगं व थुकिंया अर्थ थेंजा:गु लेख ब्वना यक्व हे सय्केगु सीकेगु मौका दत । भीसं स्वकं वीगु धया: वयाचवना । स्वकं मखु, सगं धाय्गु धका: सिल । अले सगं वीगुया अर्थ छु ख: ? छाय् वीमाल उकी छु छु सामान मा: धका: नं बांलाक न्हयथना त:गु दु । उकिं ज्वजलपाया हरेक अंक विशेषांक जुया चवंगु दु । थ्व पत्रिका जिं मुंका: तयागु दु । सुभाय्

जगदीश महर्जन, न्हूबजा:, किपू-१७

ज्वजलपा /

किपूया दुरुपुखुलीया लः
भाजंगा:या रिजरभ्वायरं वितरण
याइगु ल:या ग्राहकपिं लः मवया:
स्वलान्त्य:निसें तचकं समस्याय्
लानाच्वंगु खः ।

अथे धइगु किपूया १३ वडा
चवभा:, १८ वडाया इतागवः,
भाजंगः, वडा नं.९या सालिक
ध्वाखासी व वडा नं.३ व १७
लागाय् भाजंगलं लः इना:
वयाच्वंगु खः ।

ल:या तसकं हाहाकार
जुसेंलिं सुन्दरीघाटया लः
भाजंगा:या रिजरभ्वायरय् दिका:
न्यंकनं इनेगु ज्या यात । स्वला
तक व लः इना:बिल ।

गुगु ल:त्वना मनूत विरामी नं
जुल । व लः फोहर व त्वनेहे
मज्यूगु नास्तया रिपोर्ट वयेवं
किपूमीतसें व लः बन्द याकल ।
थ्वहे ल:या खँय वंगु पुस ३०
गते लः त्वनेमखीपिं जनतातसें
ल:या व्यवस्था यायेत खानेपानी



केन्द्रिय ज्याकुथी धर्ना च्वंवबलय्
७ गू बुंदाया सम्भौता जुल ।

स्वलातकनं व सम्भौता
बमोजिम छुं हे ज्या मजुसेंलिं
किपूमित आक्रोसित जुल । वंगु
फागुण १४ गते सुक्रवा: किपूया
न्हूवजारय् मुना: जुलुस
न्त्याकल । सुन्दरीघाटया फोहर
लः त्वने हे मखु, अमृतथें च्वंगु

दुरुपुखुया लः हे त्वंकमा:, भ्रष्ट
कर्मचारीयात कारवाहीया धका:
नारावाजी यानां खानेपानीया
ज्याकुथी धर्ना च्वनेगु ज्या जुल ।

जुलुसया नेतृत्व यानावपिं र
मेश महर्जन, कृष्णहरि महर्जन व
ध्रुव महर्जनपिं खानेपानीया न्हूम्ह
हाकिम ई. नारायण कर्णालिसे
खँलाबल्हा या: वन । कर्णहे



धर्नाकारीपनि न्ह्यःनेवया: थः
न्हूम्ह जुगुलिं थनया वस्तुस्थिति
थुइके मफुनि । सकसियालिसें
सहलह व्याका: भिन्त्यान्हुया दुने
ल:या समस्या समाधान यायेगु
वचं बिल ।

अर्नालिपा हानं प्रदर्शनकारीत
जुलुसया रुपय् किपू नगर
पालिकाया ज्याकुथी छरखाय् धर्ना

च्वंवन । अन नं नगरपालिकाया
प्रमुखलिसे खँलाबल्हा जुल ।
कृष्णहरि महर्जन, ई.ध्रुव महर्जन
थःथःगु खँ तय्धुंका: रमेश
महर्जन ज्ञापन पत्र व मांग पत्र
न्त्यब्वल । उगु मांग पत्रय् ल:या
व्यवस्था सुयांलाकेगु निंतिं ४
इञ्चया पाईप १८०० मिटर
उपलब्ध याना जडान यायेगु ज्या

याकेमाल, दस हजार लिटर लः
न्त्यंगु ५ न्यागः द्यांकी तुरुन्त
वीमाल व न्हापा जूगु सात बुंदे
सहमति तुरुन्त लागु यायेमाल
धया तःगु दु ।

वार्ता टोलीनाप सहमति जूसां
जनताया न्ह्यःने हे न्वंवाय्माल
धका: जुलुसय्:पिनिसं मांग
यायेवं नगर प्रमुख पिनेवया:
सकसियां न्ह्योने याकनं मांग
पूर्वकेगु कुतः यायेगु, तत्कालया
निंति निगः द्यांकी न्यानावीगु
प्रतिवद्धता व्यंसेलि तिति धर्नाकार
ित सुम्कच्वन ।

जुलुसया ज्याभवः अन हे
क्वचायेकल । पुलांगु समितिं
पुलांगु समिति भंग याना:
ल:त्वनेमखंगु थाय्यापिं प्रत्येक
वडां निम्ह निम्ह तया: न्हूगु
समिति दय्का: ज्या याना: वनेगु
क्वःछयूगु दु ।

ज्यापु महागुथि यें महानगर समितिया प्यक्वःगु तःमुँज्या



ज्यापु महागुथि यें महानगर
समितिया प्यक्वःगु तःमुँज्याया
उलेज्या थौं शनिवा: बसन्तपुरय्
तःजिक क्वचाल । उगु उलेज्या
न्ह्यः येंया भिन्त्यःत्वा:या परोपकार
स्कूलं छगू तःजिगु सांस्कृतिक
ज्याली पिकासें नगर परिक्रमा
या:गु खः ।

बसन्तपुरय् जूगु ज्याभवलय्
प्यक्वःगु तःमुँज्याया उलेज्या नेवा:
न्ह्यलुवा: लिसें ज्यापु जातिया
नेतृत्व याना: वयाच्वनादीपिं ई.

मोहनकृष्ण डंगोल, देवबहादुर
डंगोल, राजभाई ज्यापु व ज्यापु
महागुथिया केन्द्रीय नायः र
जभाई जकःमिं यानादीगु खः ।

यें महानगर समितिया नायः
रामबहादुर डंगोलया
सभापतित्वय् जूगु उगु
ज्याभवलय् लसकुस न्वचू
समितिया न्वकू बाबुराजा
महर्जनं बियादीगु खः ।

ज्याभवलय् पाहाँ कथं थीथी
नेवा: न्ह्यलुवा:पिं, प्रतिष्ठित

ज्यापु समुदायपिन्त ब्वनातःगु
खःसा विशेष रुपं नेपा:या फुटबल
कासाया नांजा:पिं कासामि
विराज महर्जन, उपेन्द्रमान सिंह,
फुटबल प्रशिक्षक बालगोपाल
महर्जनपिं नं भायादीगु खः ।


थ्वहे भवलय् ज्यापु महागुथि
यें महानगर समितिपाखें फागुण
१५ व १६ गते जुइगु ज्यापु
महागुथि यें महानगर समितिया
प्यक्वःगु तःमुँज्याया भवलय् थीथी
ज्याभवः न्ह्याकाच्वंगु महानगर

समिति वंगु फागुण १३ गते
विहिवा: छगू पत्रकार सम्मेलन
याना: तःमुँज्याया जानकारी
बियादिल ।

‘ज्यापु जातिया उन्नति, भीगु
देय्या समृद्धि’ धैगु नारा ज्वना:
जुइत्यंगु उगु अधिवेशनया प्रचार
प्रसारया ज्याभवः पत्रकार मुँज्या
या:गु खः ।

पत्रकार मुँज्या येंया नरदेवीइ
च्वंगु महागुथि बहुउद्देशीय
सहकारी संस्थाय् जूगु खः । उगु
समिति वहे दिनय् सनिलय्
पुखुधा: त्वालं सुकुन्दा ज्योली
पिका:गु दु ।

ज्यापु महागुथि यें महानगर
समितिया प्यक्वःगु तःमुँज्याया
उलेज्या म्हिगः शनिवा: तःजिक
बसन्तपुरय् जुल सा थौं
आइतवा: बन्द सत्रपाखें न्हूगु
नेतृत्व ल्ययेत्यंगु दु ।



किपूया गथु प्याखं (गं मखा:गु प्याखं)

सफू बजारय् पिदने धुंकूगु दु थःगु प्रति सुरक्षित यानादिसँ

सफू दइगु थाय्

- १) खपया च्याम्हसिंहया स्टेशनरी पसः (श्याम सुन्दरया पसः)
- २) खप कमल विनायकया स्टेशनरी पसः
- ३) किपूया सतःक्वया स्टेशनरी पसः
- ४) किपूया देय् पुगूया बाघभैरव स्टेशनरी पसः
- ५) किपूया पांगा दोवाटोया किपू बूक प्वाइट
- ६) येंया भोताहिंति नातिवज्रया पसः
- ७) येंया कुलाभुलिइ च्वंगु मंका: धुकू पसः
- ८) यल, यल ध्वाखा अर्जुन स्टेशनरी पसः
- ९) स्वापू निंतिं मेमेगु फोन नम्बर: ४३३४०९३, ९८४९७५२५८३, ९८४६०४६९२३९

मू
सच्छि तका जक (१००/-)

चवयेगु साधना खः कि रहर ?



अगिव बनेपाली

परहर छगू अज्याःगु वस्तु खः गुकिं मनूयात छुं यायेगु त्वता चूलाकाबी । व छगू कथं सिर्जनोन्मुख पलाः खः, भावना खः, मनया लालसा नं खः । अज्याःगु रहर, लालसा, कर्तव्यबोध आदिया कारणं मनूया म्वायेगु इच्छा च्वलनाच्वनि ।

वाः मचायेक वं थःगु जीवन न्ह्याकाच्वनि । वस्, व मनुखं गुलिं खँ वाःचाइ गुलिं खँ वाः चायाच्वनि मखु । सखे, थ्वहे खँ थुइकका लोकंत्वाम्ह न्हापांमह मनोवैज्ञानिक सिग्मण्ड फ्रायडं मनूया मनयात स्वंगू तगिमय ब्वथला

बिल – चेतन, अर्धचेतन, अवचेतन नुगः । म्वायेगु भवलय् मनुखं भोगे याना, खनाः, न्यनाः, यक्व खँ थुइकि ।

गुलिं वं वाःमचायेकं मनय् थ्यु वनि । रहर, इच्छा, लालसाया कथं खँ मनय् थानाच्वनि । अज्याःगु खँ मनुखं वं वाःमचायेकं हे व्यवहारय. क्यनाच्वनि । अबलय् व मनु थःगु व्यवहार खनाः थः हे ज्यः जुयाः च्वनि । गुलिं खँ व्यवहारय धाःसा वं वाः चायेका थः स्वतस्फुतए रुपं व्यवहार यानाच्वनि ।

अज्याःगु इच्छा पूवनाच्वनि मखु थिपिं व मनुखं म्हगसलय् खनाच्वनि । थःगु इच्छा विपनाय् मखुसां म्हंगसय् पूवकाच्वनि । थःगु इच्छा, आकांक्षा, ततमत क्यंगु खँ मनुखं छुं नं छुं कथं ब्वयाच्वनि । वं ज्या यानाः, सङ्गीत सिर्जना यानाः, म्हिताः, ख्याः, न्हिलाः, अथेतुं च्याः, नुगः खँ प्वकाः । अज्याःगु खँ प्वके मफत वा मखन वा मसल धाःसा उकिया प्रभावं दिमाग खलबलय् जुइफु, विछिप्त जुइफु, मनु वँय नं जुइफु ।

थुकथं वयेबलय् चवयेगु छगू रहर मखु बाध्यता जुइफु । मनया खँ व्याकेगु

छगु कुतः । व कुतः जीवनया छगु उपलब्धि खः । व सिर्जना खः, जीवनया थःगु मचामगागु कमजोरी त्वपुइगु कुतः- क्षतिपूर्ति सिद्धान्त मनोब्रज्ञानिक एडगरया । थ्वकथं स्वयेबलय् चवयेगु छगु साधना कथं दं वइ व रहर मखु । मनय् लिकुनाच्वंगु खँ अलय् थःगु कमजोरी त्वपुइगु कुतः ला खत व चवयेगु कुतः ।

रहर गुकथं जुइ ? छायाःसा व वयागु बसय् मदुगु खँ । अफ्र मेम्ह मनोवैज्ञानिक युड (जुड)या कथं ला अभिव्यक्ति व्यक्तिगत कथं जूसां व वया याकचाया मखु, यक्व पुस्तां भोगे यानाः वयाच्वंगु पीडा, कुण्ठा (ततमत क्यंगु), ज्याना वनाच्वंगु समस्या, शोषण, अन्याय, अत्याचारया लिचः खः ।

चवयेगु छगु नुगःया मल्हम खः । छगु म्वासु । छगु सिर्जना खत । व र हर कथं दनाच्वंसा जीवनया अभिव्यक्ति हे खः ।

गुगु तःधंगु साधना कथं पिज्वया च्वनि । जवतक रहरया कथं नाला च्याच्वनि अन जीवन दइमखु । साधनां ब्वलीक सिर्जना व जीवन ।

मुसुक्क छक न्हिले माल



अशोक सोकी

सासः दःसां जिला सी हे धुंकल दानव न्हिला बिल
द्यःत सुम्क च्वनाविल
उकुस मुकुस छटपटाहतं
मनयागु विष लगाय् जुल
धर्म यानाः पाप पुन
पापीतयत् पुण्य
पिने सुखैसुख जूपिन्त
दुःखै दुःख दुने
पिने दुःखै दुःख दुपिन्त
सत्य सुख दुने
स्वैत कने,
स्वैत धाये
धयां छुं जुइगु मखु
गजाःगु बज्र फयेमाल
मन जिं तये फूगुमखु
गजाःगु अमाई पीलात
पुन्हिं गुबले वःगुमखु
निराशया पुसा थ्व कलमं
त्वलाः च्वने माल
थ्व नं छगू दुःख खः
अयसां सह यायेमाल
दुःखै दुःख प्वःचिना
मुसुक्क छकः न्हिले माल ।

मिजंतसें सीमखुगु मिसातयगु ७ गू रहस्य

आपालं आपाः मिजंतयसं मिसातयगु बारे थुलि जक सी कि गुलि इमिसं खन व न्यनातःगु दइ । प्रत्यक्ष खनीगु आचरण, व्यवहार व जिउडाल म्हगःया बारे दुसां व स्यूसां नं यक्वसित मिसातयगु अन्तरंग रहस्यया बारे मसीफू । मिसातयगु बारे मनोविज्ञतसें तर्क धाइगु छगू खँ छु धाःसा मिसात धैपिं धात्ये हे रहस्यमयी जुइ । इमिगु मनय् थुज्वःगु रहस्यत सुलाच्वंगु दइ कि गुगु रहस्य इमिसं मेपिं सुयात नं धाइमखु ।

सुं मिजं नं मिसाया बारे थःम्हं फुक्क स्यू धकाः घमण्ड याइ, चाहे व थः जीवनपासाया हे छाया मजुइमा । थये धाइम्ह मिजंया खँ खालि बकंफुसुगु खँ जक जुइ । व मिजं मिसाया बारे छम्ह अनभिज्ञम्ह जक जुइ । छायाःसा फुक्क मिसातयके थुज्वःगु रहस्य दइ कि गुगु रहस्य इमिसं सुयात नं धाइमखु ।

उज्वःगु ७ गू रहस्य थये दु

१) मिसां मेम्ह मिसायात नं माया मतिना याइ । प्रायः मिसां मेम्ह मिसायात थः प्रतिस्पर्धी व दुश्मन भाःपी धकाः धाइ । तर थीथी सर्वेक्षणं छु क्यंगु दु धाःसा छम्ह मिसां मेम्ह मिसायात नं अतिकं माया व मतिना याइ । मिसातयत मेम्ह सुं स्टाइलिस मिसायात स्वये चाहे जुइ ।

२) मिसातसें तसकं हे चियोचर्चा याइ । उज्वःगु चियोचर्चा थः वर्तमान जीवनपासा वा सरोकारवाला मनूया बारे जक जुइमखु । थः पुलांम्ह मतिनामिया बारे नं इमिसं तसकं हे चियोचर्चा याइ । थः पुलांम्ह मतिनामि आः सु नाप दु ? थः पुलांम्ह मतिनामिया न्हूम्ह मिसा गथे च्वं ? इमिगु जीवन गथे न्ह्यानाच्वंगु दु ? धइगु बारे न्ह्याम्ह नं मिसाया तःधंगु चासोया विषय जुइ ।

३) थीथी अध्ययन कथं पोर्न हलंज्वलं स्वयेगु मामिलाय् मिसात नं मिजंतथे हे पार खी जुइ । तर थःगु व इच्छा वा बानीयात इमिसं मेपिनिगु न्ह्यःने खुलासा यायेगु व स्वीकार यायेगु ज्या धाःसा तुरुन्त सितिमितिं याइमखु ।

४) मिसातयत थःगु जिउडाल म्हगःया माया अतिकं वनी । याकःचा जुइबलय् वा ज्या मदइगु इलय् मिसात थःगु म्हगःया थीथी अंग अंगत स्वया उकिया रहस्य लुइकेगु चक्करय् तनाच्वनी ।

५) याकःचा जुइबलय् मिसातयत अतिकं अचम्मया शोख चले जुइ । सर्वेक्षणया कथं थःगु गोप्य अंगत क्वथीक स्वयेगु निसं कया विकिनी न्ह्यानाः प्याखं हुलेगु व थीथी कथंया पोज बिइगु याइ मिसातसें ।

६) मिसातसें थःत जुइगु महिनावारीया विषययात तःधंगु बोझ तायेकी, खास याना ब्याहा लिपा । थः मिजं पासां थुज्वःगु मासिक चक्रया भ्रन्कटय् च्वनेम्वाःगु तर थःम्ह जक उज्वःगु दुःख सह यायेमाःगु खँ यानाः मिसातयके मिजंप्रति छगू इथ्यां यानाच्वनी । मिजंतसें नं थुज्वःगु महिनावारीया थें हे पीडा सह यायेफयेमा धैगु दुने नुगःया इच्छा जुयाच्वनी मिसातयके ।

७) मिसातयके थः मिजं पासाप्रति छुं छुं शंका यायेगु बानी नं दयाच्वनी । थः मिजं पासां छुं नं छुं खँ थःनाप सुचुका तःगु दु धैगु शंका यानाच्वनी । अले उज्वःगु सुचुकातःगु खँ सीकेगु निरति मिसात न्ह्याबले उत्सुक जुया थीथी कुतःत यानाच्वनी ।

देयून्यंकया नेवाः पत्रकारतयूत नेवाः पत्रकार राष्ट्रिय दबूया विशेष इनाप

नेवाः पत्रकार राष्ट्रिय दबूया निक्वःगु तःमुँज्या थ्व हे वइगु ने.सं. ११३६ चौलागा पारु (०७३ बैशाख ११) गते शनिवाः कुन्हु ऐतिहासिक नगरी किपुलिइ जुइगु जूगु दु । थ्व भवलय् दबूया थीथी कचाया जः न्हूधाः यायेगु, न्हूजः इनेगु व कचाया दँमुँज्या यायेगु ज्या जूवनाच्वंगु दु । थ्व ल्याखं थ्व हे वइगु ने.सं. ११३६ सिल्लागा एकादश (फागुन २२), शनिवाः कुन्हु यल कचाया निक्वःगु तःमुँज्या जूवनाच्वंगु दुसा यँ कचाया निक्वःगु तःमुँज्या ने.सं. ११३६ चिल्लाथ्व तृतिया (फागुन २८ गते) शुक्रवाः कुन्हु जूवनाच्वंगु दु । नापं काभ्रे जिल्लाया अधिवेशन ११३६ सिल्लागा आमै (फागुन २६ गते) बुधवाः यायेगु क्वःजी धुंकूगु दु ।

सम्बन्धित जिल्लाया पत्रकार व संचारकःमि पासापिसं कचाया पदाधिकारपिंत स्वापू तयाः जः न्हूधाः यानादीत, न्हूजः जुयादीत इनाप यानाः ।

(जः न्हूधाः व न्हू जः जुइगु दिं २ फागुन २० गते तक जक)


नेवाः दबूया राष्ट्रिय दबू
National Forum of newa: Journalists
ने.सं. ११३२
निक्वःगु तःमुँज्या
झःझः धायेक हने
ने.सं. ११३६ चौलागा पारु
(०७३ बैशाख ११) गते शनिवाः



राजनीतिक घटना नाप स्वाना संस्कृतिया रुप काइगु छगू उदाहरण

श्रीकृष्ण महर्जन

किपू पराजीत नाप स्वापू दुगु प्याखं धेधेपापा



धेधेपापा प्याखं

स्वनिगःया थीथी कथंया नेवाः वस्तीत मध्ये छगू महत्वपूर्णगु वस्ती खः किपू । नेपाःया इतिहास व्वनेगु इलय् नां मकाःसे हे मगाःगु यें जिल्लया नेवाः वस्ती किपू खः । ऐतिहासिक नापं सांस्कृतिक रुपं जक मखु नेपाःया राजनीतिक घटनाक्रम नाप नं इतिहासनिसें वर्तमान इलय् तक स्वनाच्वंगु वस्ती किपुलिइ थीथी कथंया संस्कृतित दु ।

नेवाःतय्सं हनीगु यक्व हे थीथी कथंया संस्कृति किपूमितयसं नं हनाच्वंगु खःसां छुं छुं संस्कृति मौलिक कथंया नं दु । अथे मौलिक कथंया किपूया संस्कृति धायेबलय् छगू ख्वाःपाः प्याखं खः धेधेपापा प्याखं ।

दैय् दसं सापारु कुन्हु क्यनीगु धेधेपापा प्याखं धइगु किपूया मौलिक प्याखं जक मखु किपूया राजनीतिक घटना नाप नं स्वनाच्वंगु प्याखं खः ।

नेपाः एकीकरणया नामय् पृथ्वी नारायण शाहया फौज याःगु आक्रमणया भवलय् निक्कः तक बांमलाक्क पराजित

यानाबिउपिं किपूमित खःसा अले किपू पृथ्वी नारायण शाहया फौज त्याक्कू घटना नाप स्वापू दुगु प्याखं धइगु हे धेधेपापा प्याखं खः ।

सापारुया दिनय् किपुलिइ पिथनीगु धेधेपापा प्याखं धइगु ख्वाःपाः प्याखं खःसा अथे हे उकुन्हु मेगु नं ख्वाःपाः प्याखं पिथनेगु याइ व धइगु चिरख्वाःपाः पुया वइगु प्याखं खः ।

किपुलिइ धेधेपापा प्याखं सुरु जुइसिबें न्ह्यःनिसें हे चिरख्वाःपाःया प्याखं दुगु खः । दच्छिया हावा हामा मदुपिनिगु परिवारपाखें उगु कथंया चिरख्वाःपाः पुइका प्याखं ल्हुइका हइगु खः ।

चिरख्वाःपाः धइगु तिर्थ ख्वाःपाः खः धाइ । चिरख्वाःपाः अर्थात तिर्थ ख्वाःपाः पुया वइपिन्सं गुता न्हूगु वसः पुना ख्वाःपाः पुया वयेमाःगु चलन दु । अले ख्वाःपाः धासा ख्वालय् हे पुइगु मखुसे आकाशपाखे स्वका वयेगु याइ । यःया ख्वाःपाः जूगुलिं चिर ख्वाःपाः पुया वया मनूत नाप मिखा चूलात धाःसा मिखा चूलाह मनु विरामी जुइ धइगु जन धारणा दु । उकिं चिरख्वाःपाः पुया वःपिन्सं सुना नं पुरा ख्वाःपाः मपूसे ख्वाःपाः आकासय् स्वका पुया वइगु खः ।

थ्व ख्वाःपाः पुया वःपिं न्हापा न्हापा जूसा प्याखं ल्हइगु खःसा थौकन्हय् धाःसा अथे प्याखं ल्हइगु यानाच्वंगु मदु । अथे चिर ख्वाःपाः पुया वःगुयात स्थानीय मनूतय्सं चिर ख्वाःपाः पुया वसः घाना वइगु धकाः धाइ । चिरख्वाःपाः अर्थात तिर्थ ख्वाःपाः न्हापा न्हापा किपूया वक्ले पुलांगु व सकलसिगु मंकाः गुथि देय् गुथिइ तया तइगु खः ।

थौकन्हय् तक नं मूल चिरख्वाःपाः अर्थात तिर्थ ख्वाःपाः देय् गुथिइ हे दु । इतिहासया कालखण्डय् ल्वापुया कारणं याना गुलिं गुलिं चिरख्वाःपाः मेमेगु थासय् लाःवंगु खः धाइ । उगु

कथंया चिर ख्वाःपाः सापारु कुन्हु छन्हु जक पित हये जिउगु जूगुलिं नं अथे मेमेगु थासय् लाःवंगु खः । वास्तवय् चिरख्वाःपाः धइगु अष्टमातृका नापं गंछि यःया ख्वाःपाः कथं नालातःगु दु ।

अयूनं चिरख्वाःपाःत मध्ये मू चिर ख्वाःपाः धाःसा देय् गुथिपाखें हे पित बिइगु यानाच्वंगु दु । गुगु छेंय नं थाचिना हइगु अर्थात सायाः नाप नापं धेधेपापा प्याखं पिथनीगु खः उगु हे छेंय नं मू चिरख्वाःपाः अर्थात तिर्थ



ख्वाःपाः पुइका वसः घाका छवया हयेमाःगु अचलन आः तक नं दिन ।

न्हापा न्हापा जूसा दच्छिया दुने मदुगु परिवारपिं मध्ये छगू परि वारं थाचिना हयेगु अर्थात सायाः जात्रा पिथनीगु खःसा लिपांगु इलय् वया त्वाः त्वालं पाः कायेगु याना हःगु दु ।

अथे त्वाः त्वालं पाः कायेगु यानाहःगु जूसां नं उगु त्वालय् दच्छिया दुने मदुगु छेंपाखें हे थाचिनेगु कथंया फुक्क तयारी यायेगु अले त्वालं हे ग्वहालि याना उगु संस्कृतियात हना च्वंगु खने दु ।

अथे थाचिना हयेगु अर्थात सायाः जात्रा सुरु याना हयेगु परिवार वा त्वाःपाखें हे वजि नकः वनेगु ख्यालः तकं क्यनेमाःगु चलन दु ।

सायाः चाःहिलीगु त्वाः त्वालय् वना वजि नकः वनेगु ख्यालः

क्यनेगु ज्या सापारु कुन्हु हे सायाः लिपा छवइगु खः । अथे वजि नकः वनीगु ख्यालः धइगु मूल रुपं बुज्या नाप स्वाका अले मनूतय्त ध्याचू नकेगु नापं न्ह्याइपुकेगु कथं ख्यालः क्यनीगु खः । विशेष याना बुज्या नाप स्वाकाः अले बुइ ज्यामि माला हया वजि नकेगु कथंया ख्यालः क्यनेगु याना वयाच्वंगु दु । ध्याचू नाप नापं न्ह्याइपुकेगु नं याइ उगु ख्यालः क्यनीगु भवलय् किपुलिइ । अथे हे न्हापा न्हापा नायिखं च्वयेकेगु धकाः



उगु हे त्वालनिसें सुरु याना धेधेपापा प्याखं गन गन क्यनी अन अन सा वायेगु अभिनय यायेमाःगु चलन दु । अथे हे थाचिना हःगु थासनिसें हे चिर ख्वाःपाः पुया वःपिं नं वनेमाःगु चलन दु ।

चिरख्वाःपाः पुयावःपिन्सं हे वास्तवय् किपुलिइ सायाःया नेतृत्व याइगु खः । विशेष याना मूल चिरख्वाःपाः पुया वःम्ह गन गन वन अन अन हे मेमेगु चिर ख्वाःपाः पुया वःपिं वनीगु अले व हे थासय् धेधेपापा प्याखं वनीगु नापं धेधेपापा प्याखं क्यनीगु थासय् हे ज्वःसा वायेगु ज्या तकं यागु खः ।

थुगु कथं किपूया सायाःया नेतृत्व वास्तवय् चिरख्वाःपाः पुया वःपिन्सं नेतृत्व याइगु खःसा चिर ख्वाःपाःयात तसकं महत्व बियातःगु दु । धेधेपापा प्याखं किपूया सायाःया थःगु हे विशेषत धइगु हे धेधेपापा प्याखं खः । धेधेपापा प्याखं धाये धुनेवं हे मनूतय्सं ह्याउँखाःपाः, म्हुकं ख्वाःपाः, न्याँत्वाः ख्वाःपाः व चिचीपाःगु बापाः च्याःया ख्वाःपाः लुमंकी ।

न्हापा न्हापां सुरु जूगु धेधेपापा प्याखंया पात्रत धइगु ह्यउँखाःपाः, म्हुकं ख्वाःपाः, न्याँत्वाः व निपाः बापाः च्याः ख्वाःपाः खः ।

कथंहं.....

सम्पदा मार्ग सुचुकुच यात



किपूया सम्पदा मार्ग सुचुकुच यायेगु अभियानकथं फागुण १५ गते सनिवा: सुथय किपुली सुचुकुच यायेगु ज्याभव: जुल ।

प्रस्तावित नां समुदाय प्रहरी सेवा समिति किपूया खसालय प्रहरी व थीथी संघ संस्थाया खसालय सुचुकुच यायेगु ज्या जूगु ख: । किपूया न्हूवजा:या ध्वाकानिसें बाघभैरव, उमामहेश्वर व चिलचो विहार वनेगु लँयात कीर्तिपुर नगरपालिका मार्फत सम्पदा मार्ग घोषणा याकेगु तातुना थुगु ज्याभव: या:गु ख: । उगु सुचुकुच ज्याभवलय प्रहरी, महिला स्वास्थ्य स्वयंसेकापि व थीथी खल: पुच:या मनुतसं ब्रतिका:गु ख: । छथ्व त:ग:वर्पिनिसं सुचुकुच याना: न्हूवजा: थ्यंक:व:गु ख:सा मेगु पुच: बाघभैरवनिसें सुचुकुच याना: न्हूवजा: थ्यंक:व:गु ख: । न्हूवजा:या ध्वाखातक सुचुकुच याना: ज्याभव: क्वचायका छव:गु ख: ।



जगतसुन्दर ब्वनेकुथि नीन्यादं पूर्वांगु लसताय् त:जिक लसता ज्याभव:

वि.सं. २०४७ साल फागुण १२ गते उवलया शिखा दिवसया दिं लाका पलिस्था जूगु नेपालभाषाया माध्यमं ब्वका: वयाचवंगु छगू यां छगू जक ब्वनेकुथि जगतसुन्दर ब्वनेकुथि नीन्यादं पूर्वांगु लसताय् थ्वहे वंगु फागुण १२ गते बुधवा: छगू त:जिक लसता ज्याभव: येँया लखुतिथय् च्वंगु जगतसुन्दर ब्वनेकुथिइ जुल ।

ब्वनेकुथि पलिस्थाकालनिसें संचालक समितिया नाय: जुया: वयाचवनादीम लक्ष्मीदास मानन्धरया सभापतित्वय् न्ह्या:गु उगु ज्याभवलय मूपाहाँ नेपालभाषा एकेडेमीया चान्सलर चित्तरञ्जन नेपाली त्वा:देवाय् मत च्याका: ज्याभव:या उलेज्या यानादीगु ख: । ज्याभवलय पाहाँकथं नेवा: स्वायत्त राज्य मंका: संघर्ष समितिया नाय: व पूर्व र ज्यमन्त्री दिलिप महर्जन, पूर्व राज्यमन्त्री तीर्थराम डंगोल, ब्वनेकुथिया प्रिन्सपल माया मानन्धर, संस्थापक दुज:पिं विष्णु चित्रकार, अनाररत्न बज्राचार्य, राजभाई जक:मि, अमेश बज्राचार्य, मनूदास श्रेष्ठ, चुन्दा बज्राचार्य, शान्ति मानन्धर, भगवती महर्जन नं आशन ग्रहण यानादीगु ख: । लसकुस न्वचू प्रिन्सपल



माया मानन्धर लसकुस न्वचूया लिसें ब्वनेकुथिया प्रगति विवरण नं न्ह्यवयादीगु ख: । अथेहे राजभाई जक:मि नुग:खीलिसें जगत सुन्दरया बारे चिनाखँ न्यंकादीगु ख: ।

दबुली आशन ग्रहण यानादीपिं सकलसित खादा न्ययेका: हंगु उगु ज्याभवलय तीर्थराम डंगोल, दिलिप महर्जन डा. चुन्दा बज्राचार्य व अनार र तल बज्राचार्यपिंसं भित्तुना न्वचू बियादीगु ख:सा विशेष हनिं याना: पद्मरत्न तुलाधर उगु ज्याभवलय भाये मफूगुलिं वय्कलं छवयाहयादीगु भित्तुना पौ ब्वना: न्यंकूगु

ख: । ज्याभवलय मूपाहाँ नेपालभाषा आकादेमिया चान्सलर चित्तरञ्जन नेपाली ब्वनेकुथिया संचालक समितिया दुज:लिसें संस्थापकपिन्त दोसल्ला न्ययेका: हनादीगु ख:सा मतनाया चिं नं ल:ल्लानादीगु ख: ।

मतनाया चिं देछायेगु भवलय ब्वनेकुथिया संस्थापक नाय:लिसें ज्याभव:या सभापति लक्ष्मीदास मानन्धर ब्वनेकुथिया गुरु व गुरुमापिन्त मतनाया चिं ल:ल्लानादीगु ख: । लसता ज्याभव: क्वचायेधुंका: ब्वनेकुथिया कलाकार पुचलं थीथी सांस्कृतिक ज्याभव: न्ह्यव:गु ख: ।

बिचा: हायेका



मदुम्ह कुल नारायण महर्जन

बूगु दिं : वि.सं.१९९० कार्तिक मदुगु दिं : २०७२/११/१०

ज्यापु महागुथि किपू नगरसमितिया जीवकाछि ज: पुष्प महर्जनया अबु कुलनारायण महर्जन (लोकतान्त्रिक चोक, न्हूवजा:, किपू-३) थ्वहे वंगु फागुण १० गते ८३ दँय् आकाभाकां मदुगुलिं मदुम्हेसिया सुखावति भुवनय् बास लायेमा धका: श्रद्धाञ्जली देछाना च्वना ।

थुगु दु:खया इलय् सकल छँज:पिन्सं मनचिइ फयेमा

धका: बिचा: हायेका च्वना ।

ज्यापु महागुथि किपू नगरसमिति
किपू

तपाईंको टोलमा भएका घटना कीर्तिपुरको समाचार बनाउने हो भने तपाईं एक कल फोन गर्नुस् हामी तपाईंको टोलको समाचार कीर्तिपुरको समाचार बनाईदिनेछौं

कीर्तिपुरको
चित्रण



किपुलिं पिदनाच्वंगु कीर्तिपुर सन्देश वा:पौ व ज्वज्वलपा: वा:पौया ग्राहक जुइगु नितिं स्वापू तयादिसँ

कार्यालय: निखासी टोल: कीर्तिपुर नपा-३
फोन नं.: ४३३३००७, ९८४१४०१०७७

ज्वजलपा वा:पतिइ छिगू चिनाखँ/बाखँ/हाइकू विज्ञापन व मेमेगु च्वसू पिथनेगु जूसा जिमित स्वापू तयादिसँ

सकलसिगु मंका: स:



ज्वजलपा वा:पौ

ज्याकू: निखासी त्वा: किपू नपा-३ फोन ल्या: ४३३३००७, ९८०८६२६४२० ई-मेल : kirtipur_sandesh@live.com